

Pa proteccion mester saca moneda cuadra di 5 florin liher for di circulacion

Jane Semeleer, director ehecutivo di Banco Central di Aruba, durante un conferencia di prensa ayera mainta a splica e motibonan pakico ta bai saca e moneda cuadra di 5 florin for di circulacion pa pone su lugar bini cu un moneda rondo di 5 florin. El a enfatisa cu a mantene e diseño di e cinco florin den forma di moneda, solamente a haci cambio den e forma. E metal a bira aluminium brons cu ta haci cu e color lo bai ta di oro. Ademas di esei e lo tin diferente otro elemento nobo di seguridad. Den e imagen di e perfil di su Mahestad La Reina tin graba un mita corona real. Si bira e moneda di cinco florin nobo un poco di schuin, por nota e mitar corona. E corona aki a wordo traha usando e asina yama “MSP” (Minted Security Printing) technology. E ta usa tecnologia avanza di laser, cu ta haci posibel pa graba e linea hopi fini den e moneda. Testnan haci ta muestra cu, un uso normal, e imagen di mitar corona graba riba e moneda lo permanence pa por lo menos 15 aña. Monedanan cu wordo traha cu tecnologia di laser ta dificil pa falsifica. Tambe a pone ariba y abou di e imagen di e perfil di Su Mahestad La Reina e microtexto “Beatrix Koninging der Nederlanden”.

E texto ta masha chikito mes, cual tambe ta dificil pa falsifica. Un otro elemento di seguridad di hopi importancia ta un escritura den e rand di e moneda. E escritura ey ti e palabranan “God zij met ons”, mescos cu tin caba riba e florin. Pa por a pone e elemento di seguridad aki, Banco mester a opta pa cambia e forma di e moneda di cinco florin di vierkant pa rondo..

META DI CAMBIO

Tambe Semeleer a splica e meta di e cambio di e cinco florin vierkant dor di un cinco florin rondo.

Pa cu introduccion di e 5 florin nobo, Banco Central tin tres meta, esta: Saca mas liher posibel for di circulacion e cinco florin cuadra cu tin como fecha 19995 te cu 1999. Esaki ta pa proteha publico mas hopi posibel for di e eventualidad di haya un cinco florin falso den su man. Pesey Banco ta pidi e publico den e proximo dianan pa pone bon atencion riba e cinco florin cuadra, te ora e sali oficialmente for di circulacion. Duna publico suficiente tempo pa cambia nan cinco florin vierkant na banconan comercial y Banco Central. E periodo di cambio lo ta un aña. Den cuadro di esaki lo hiba un campaña



Jane Semeleer

di informacion p'asina e publico ta debidamente informa.